

PRÆPARATA  
ET  
COMPOSITA.

PRÆPARATA  
ET  
COMPOSITA.





PRÆPARATA  
ET  
COMPOSITA.

---

ACETUM AROMATICUM.

Recipe Summitatum Rosmarini,  
Foliorum Salviæ, singulorum  
Uncias quatuor,  
Florum Lavendulæ Uncias duas,  
Caryophyllorum Drachmas duas,  
Aceti vini Libras octo.

Macera per quatrimum & humorem  
expressum cola per chartam.

ACETUM CONCENTRATUM.

Acetum vini in vase ligneo gla-  
cietur gelida hyeme, & humor in me-  
dio hærens, a glacie separatus, fervetur.  
Satis acre est acetum, si ejus Drachma



sufficit ad Alkali Tartari Scrupulum faturandum.

Eodem modo fit SUCCUS CITRI CONCENTRATUS, si gelu cogitur donec tertia tantum pars superfit.

#### ACETUM DESTILLATUM.

R. Aceti vini quantum placet.

Balnei maris calore ex retorta vitrea destillet aceti circiter quarta pars, quæ phlegma est. Mutato tum excipulo continuet destillatio quamdiu limpidus prodit humor, qui servetur.

#### ACETUM LITHARGYRI.

R. Lithargyri triti Libram semis,  
Aceti vini Libras duas.

Subinde agitando bacillo ligneo digere, donec chartæ Lacmus tinctæ color cœruleus ab aceto non mutetur. Quod post subsidentiam limpidum est serva.

#### ACETUM ROSACEUM.

R. Florum Rosæ rubræ ficcatorum quantum placet,  
Aceti vini Duodecuplum pondus.



Macera per quatrimum & humorem  
per chartam cola.

Ex floribus Sambuci eodem modo  
paratur ACETUM SAMBUCINUM.

ACETUM SCILLITICUM.

R. Scillæ ficutæ concisæ quantum  
placet,

Aceti vini Duodecuplum pondus.

Macera per octo dies; deinde exprime  
humorem, quem defæcatum cola.

ACIDUM NITRI FUMANS.

R. Nitri purificati Libras duas.

Sub camino, caute vaporem evitando,  
in retorta vitrea sensim adjice

Acidi Vitrioli concentrati Libram  
unam.

Excipulum grande & convenienter tubu-  
latum mox applicetur, atque igne grada-  
tim aucto fiat destillatio.

Si aquæ puræ Libræ duæ vasi reci-  
pienti inditæ sunt ante destillationem,  
ACIDUM NITRI DILUTUM habetur.



## ACIDUM SALIS COMMUNIS.

R. Acidi Vitrioli concentrati,  
Aquæ puræ, singulorum Libram  
unam.

Caute commixtis adjice  
Salis communis Libras duas.

Mox applicetur excipiens vas conve-  
nienter tubulatum, & modico igne fiat  
destillatio.

Quod in retorta residuum est, aqua di-  
lutum & per chartam colatum, crystal-  
lisando dat ALKALI MINERALE VITRIO-  
LATUM, sollicitè a sale communi sepa-  
randum.

ACIDUM TARTARI  
CRYSTALLISATUM.

R. Cretæ præparatæ & aqua calida sæ-  
pius ablutæ Libras duas,

Aquæ fluvialis Libras triginta duas.

Post brevem ebullitionem sensim adjice

Cremoris Tartari Libras septem, vel  
quantum satis est ad saturandum.

Vase ab igne remoto stent per horæ di-  
midium: deinde in vas vitreum caute  
transfunde liquorem limpidum superna-



tantem, & residuum, seu Selenitidem tartareum ablue, aquam bis vel ter affundendo.

Huic residuo postea adde

Acidi Vitrioli tenuis Libras sedecim. Spathula lignea sæpius agitando digere per diem. Liquorem acidum deinde effunde in vas vitreum; residuo autem admisce

Aquæ fluvialis Libras sedecim. Cola per chartam, atque residuo affunde iterum aquam, donec insipida fit. Liquores acidi commixti in vase vitreo, modico calore decoquantur ad crassitudinem syrapi tenuioris, qui percolatus seponatur ut crystallos demittat. Crystalli tandem post repetitam evaporationem collectæ, super chartam siccantur & loco sicco ferventur.

Si ante crystallisationem pauxillum liquoris acidi spissati ex aquæ puræ quadruplo diluitur, & Aceti Lithargyri guttæ nonnullæ instillantur, album mox subsidet sedimentum. Si guttæ aliquot Acidi Nitri diluti tum adduntur, limpida statim fit mixtura, quum purus ac ab Acido Vitrioli penitus liber est liquor



tartareus: sin minus, lactescit. Vitio vero huic mederi poteris, si Acidum Tartari ex aquæ libris sex diluitur, & unciis nonnullis Selenitidis tartarei additis, digeritur, colatur atque crystallos deponit.

### ACIDUM TARTARI DESTILLATUM.

Tartarus crudus contritus retortæ fictili, vel ferreæ, tubulatæ immittatur, ut hujus duas tertias partes occupet, & igne sensim aucto fiat destillatio. In recipiens vas, quod capacissimum fit, transibit una cum oleo liquor acidus, qui ab illo separatus ex retorta vitrea iterum destillet.

Quod in retorta fictili vel ferrea residuum est, ex aqua fluviali dilutum & per chartam colatum coquatur, donec exsiccet, atque tum ALKALI TARTARI dicitur. Si hoc album non apparet, tale tandem fit ustione, dissolutione, colatione & evaporatione repetita.



ACIDUM VITRIOLI  
CONCENTRATUM.

Acidum Vitrioli forte in retorta vitrea ad modicum ignem coque, donec liquor destillans discretis guttulis, roris instar, in collo retortæ non appareat. Liquorem limpidum, in retorta remanentem, calidum etiamnum transfunde in lagenam vitream siccam, & epistomio vitreo ab aëris accessu serva.

## ACIDUM VITRIOLI TENUE.

R. Acidi Vitrioli concentrati Unciam unam,  
Aquæ destillatæ Uncias octo.  
Sensim & caute misceantur.

## ADEPS CURATA.

Cum membranulæ, venæ & fibrillæ diligenter exemptæ sunt, aqua lavetur adeps: deinde liquetur ad modicum ignem, & post humidi exhalationem coletur.

Eodem modo fit SEVUM CURATUM.



## AETHER VITRIOLATUS.

R. Spiritus vini rectificatissimi,  
Acidi Vitrioli concentrati, singulo-  
rum Libras tres.

In cucurbita vitrea caute misceantur,  
Acidum vitrioli paullatim Spiritui in-  
stillando. Mixta stent per aliquot dies,  
& ad modicum ignem destillent primum  
Unciæ sex vel octo, quæ separatæ ser-  
ventur ad alios usus. Excipulo tum mu-  
tato continuet leni calore destillatio, do-  
nec strizæ in alembico non appareant;  
sollicite cavendo ne massa nigra, in cu-  
curbita manens, ascendat & omnia per-  
dat. Liquorem destillando elicatum di-  
lue ex Aquæ Calcis limpidæ pari quan-  
titate, & AETHEREM supernatantem serva  
in lagena vitrea epistomio vitreo bene  
occlusa.

## AETHIOPS ANTIMONIALIS.

R. Hydrargyri purificati Unciam unam  
& dimidiam,

Kermes mineralis Unciam unam.

In mortario vitreo simul terantur donec  
intime commixta sint.



## AETHIOPS MARTIALIS.

R. Limaturæ ferri purissimi, non rubiginosi, quantum placet,

Aquæ fluvialis quantum satis est ut eam contegat.

In vase vitreo lato stent per plures hebdomadas. Limaturam, aqua undique submersam, spatula lignea quotidie agita, donec magna ferri pars in pulverem tenuem resoluta sit. Aquam illo turbidam decantha, ut quieta demittat pulverem, qui, ab aqua separatus, celeriter ficcari debet atque vase clauso servari.

## AETHIOPS MINERALIS.

R. Sulphuris quantum placet.

In vase ferreo capaci ad modicum ignem liquefacto adjice

Hydrargyri purificati Par pondus.

Spatula ferrea diligenter agita per horæ dimidium, ut mellis spissitudinem retineat. Si crassior fit massa, igne paulum aucto liquefcat, & refrigerata in mortario ferreo teratur in pulverem.

D



## ALKALI AMMONIACUM.

R. Salis ammoniaci quantum placet,  
Alkali lignorum depurati Duplum  
pondus.

Separatim pulverata commisceantur in  
cucurbita vitrea, & mox adaptato alem-  
bico fiat sublimatio.

ALKALI AMMONIACUM  
ACETATUM.

R. Alkali ammoniaci quantum placet.  
Subinde agitandò, per vices adjice  
Aceti concentrati quantum satis est  
ad saturandum.

ALKALI AMMONIACUM  
AQUOSUM.

R. Salis ammoniaci depurati Libram  
femis,  
Alkali lignorum depurati Uncias  
novem.

Separatim pulveratis & in retorta vitrea  
mixtis adjice

Aquæ puræ Libram unam.  
Modico igne fiat destillatio, donec re-  
siduum in retorta exsiccatum sit.



ALKALI AMMONIACUM  
CAUSTICUM.

R. Calcis nuper ustæ Libras duas,  
Aquæ puræ Libram unam.  
In retorta vitrea capaci sensim commix-  
tis, post calcis extinctionem adjice  
Salis ammoniaci pulverati Libram  
unam.  
Mox applicetur excipulum grande, &  
ad exiguum ignem destillet liquor vola-  
tilis, qui lagena vitrea, epistomio vitreo  
obturata, fervetur.

ALKALI AMMONIACUM  
SPIRITUOSUM.

R. Salis ammoniaci Libram unam,  
Alkali lignorum depurati Libram  
unam & dimidiam,  
Spiritus vini gallici Libras quatuor.  
Ad exiguum ignem destillent Libræ duæ.

ALKALI AMMONIACUM  
SUCCINATUM.

R. Spiritus vini rectificatissimi Unciam  
unam,



Olei Succini rectificati Scrupulum  
unum,  
Saponis albi Grana duo.  
Ubi omnium unitas facta est, adjice  
Alkali ammoniaci caustici Uncias  
quatuor.

#### ALKALI HERBARUM FIXUM.

Herba Absinthii vel alius plantæ amarae, una cum stipitibus, redigatur in cinerem, qui sartagine ferrea uretur donec albescat; deinde ex aqua fluviali calida diluatur. Lixivium per linteum colatum supra modicum ignem decoquatur donec omnis humor consumtus sit.

#### ALKALI LIGNORUM DEPURATUM.

R. Cinerum clavellatorum Libras duas,  
Aquæ fluvialis Libras tres.  
Fiat lixivium, quod per linteum colatum in olla ferrea coquatur donec exciccetur.

#### ALKALI MINERALE FIXUM.

R. Sodæ hispanicæ contritæ quantum placet,



Aquæ fluvialis fervidæ quantum satis est ad diluendum.

Lixivium per linteum colatum, post lenem exhalationem, in vase vitreo sepônatur loco frigido, ut cryſtallos demittat.

ALKALI MINERALE  
TARTARISATUM.

R. Alkali mineralis fixi Libram unam,  
Aquæ fluvialis Libras tres.

Lixivio fervido ſenſim adjice  
Cremoris Tartari quantum ſatis fit  
ad ſaturandum.

Liquor per chartam colatus vaporet, donec pellicula appareat: tum loco frigido reponatur, ut cryſtallos demittat.

ALKALI VEGETABILE  
ACETATUM.

R. Alkali lignorum depurati Libram unam & dimidiam.

In vaſe vitreo capaci admisce  
Aceti deſtillati Libras octo.



Parte circiter dimidia vaporando supra ignem consumpta, per vices iterum addatur Acetum destillatum usque ad plenam saturationem. Liquor tandem, ad dimidium exhalando redactus, per chartam coletur, & balnei maris calore vaporet donec exsiccetur.

ALKALI VEGETABILE  
TARTARISATUM.

R. Alkali lignorum depurati Libras duas,  
Aquæ fluvialis Libras octo.

Lixivio ferventi adjice

Cremoris Tartari quantum satis sit ad saturandum.

Liquor etiamnum calens per pannum laneum colatus leni calore vaporet donec exsiccetur.

ALKALI VEGETABILE  
VITRIOLATUM.

R. Acidi Vitrioli fortis quantum placet,  
Aquæ fluvialis calidæ Decuplum pondus.

In vase vitreo capaci caute & sensim commixtis adjice



Alkali lignorum depurati, aqua diluti, quantum fatis fit ad saturandum.

Liquor per chartam colatus seponatur, ut crystallos demittat.

ALUMEN USTUM.

In patina ferrea uratur Alumen donec spongiosum fiat.

ANTIMONIUM PRAEPARATUM.

Antimonium crudum in mortario ferreo contritum cum aqua multa misce & agita. Aquam polline tenuissimo saturam transfunde in vas idoneum & sepone. Crassior pulvis residuus, denuo tritus, eodem modo tractetur, atque subsidentes pulveres tenuissimi ficcati serventur.

Sic quoque præparantur BOLUS ARMENIA, CALAMINARIS LAPIS, CORNU CERVI USTUM, CORALLIUM RUBRUM & CRETA ALBA.

AQUA ANETHI.

R. Seminis Anethi Libram semis.

Aquæ puræ quantum fatis fit ad evitandum empyreuma.

Destillando eliciantur Libræ sex.



Eodem modo parantur AQUA FENICULI & PETROSELINI, feminum.

### AQUA AURANTII.

R. Florum Aurantii recentium Libras tres,

Aquæ puræ quantum satis sit ad empyreuma evitandum.

Destillando eliciantur Libræ sex.

Eodem modo parantur AQUA ROSÆ DAMASCENAE & SAMBUCCI, florum.

### AQUA CALCIS.

R. Calcis recens ustæ Libram unam.

Sensim affunde

Aquæ fluvialis Libras octo.

Ebullitione, quæ inde oritur, peracta, vas agitetur: deinde subsidat Calx, & aqua per chartam colata lagenis rite occlusis fervetur.

Ex Testis ostrearum ustis eodem modo paratur AQUA CALCIS OSTREARUM.

### AQUA CERASI.

R. Cerasorum nigrorum, maturorum, cum nucleis contusorum Libras viginti,



Aquæ puræ quantum satis est ut evitetur empyreuma.

Destillando eliciantur Libræ viginti.

Simili modo paratur AQUA FRAGORUM.

AQUA CINNAMOMI.

R. Cinnamomi indici Libram unam,  
Vini gallici albi Libras duas,  
Aquæ puræ quantum satis est ad evitandum empyreuma.

Destillando elice Libras sex aquæ, cui admisce

Sacchari albissimi pulverati Unciam unam & dimidiam.

AQUA MENTHAE CRISPÆ.

R. Foliorum menthæ crispæ recentium Libras quatuor,  
Aquæ puræ quantum satis sit ut evitetur empyreuma.

Destillando eliciantur Libræ sex.

Eodem modo parantur AQUA HYSOPI, MENTHAE PIPERITIDIS, PULEGII & RANUNCULI ALBI.



## AQVA PICEA.

R. Picis liquidæ Libras duas,  
Aquæ fluvialis Libras octo.  
In vase ligneo mixta agita bacillo li-  
gneo: deinde per duodecim horas subsi-  
dat pix, & aqua decanthur.

## AQVA SATURNINA.

R. Aquæ destillatæ Libras duas,  
Spiritus vini gallici Unciam unam,  
Aceti Lithargyri Unciam semis.  
Misceantur.

## BALSAMUM AROMATICUM.

R. Olei Nucis Moschatæ expressi Un-  
ciam unam,  
Ceræ flavæ Drachmas duas.  
Modico igne liquatis, & inde remotis,  
admisce  
Olei Caryophyllorum,  
Lavendulæ, singulorum Drach-  
mas duas,  
Succini rectificati Scrupulum se-  
mis.

BAL-



BALSAMUM SULPHURIS  
SIMPLEX.

R. Olei Lini Libram unam,  
Sulphuris contriti Uncias duas.  
Spathula lignea agitando coque in vase  
ferreo capaci, supra modicum ignem,  
donec coeant in unum.

BALSAMUM SULPHURIS  
TEREBINTHINATUM.

R. Olei ætheri Terebinthinæ Unciam  
unam,  
Balsami Sulphuris simplicis Drach-  
mas tres.  
Commisceantur.

## BALSAMUM TRAUMATICUM.

R. Benzoes contritæ Uncias tres,  
Aloes socotrinæ Unciam semis,  
Spiritus vini rectificati Uncias trigin-  
ta duas.

Digere per biduum: deinde adjice  
Balsami peruviani Uncias duas.

Digere iterum per triduum & cola.



## CALX ANTIMONII.

R. Antimonii pulverati Libram unam,  
Nitri purificati Libras tres.

Mixta in crucibulum ignitum sensim injiciantur. Detonatione peracta in igne detineatur massa per horæ dimidium, cavendo tamen ne liquetur: refrigerata teratur in pulverem, vitro occluso servandum.

Si hæc massa sæpius abluatur aqua calida, donec prorsus insipida sit, CALX ANTIMONII ELOTA dicitur.

Liquor autem per chartam colatus, post exhalationem justam, crystallos ponat, quæ sub nomine NITRI ANTIMONIATI veniunt.

## CALX ZINCI.

Zinci frustula ignito crucibulo capaci, alto & inclinato, per vices injice ut inflammentur. Calx sublimata, alba, & levis eximatur successive, ne aëris accessum impediat, & tandem per cribrum trajiciatur.

## CAMPORA PURIFICATA.

R. Camphoræ crudæ Libras duas,



Calcis ustæ pulveratæ Unciam unam.  
 Simul trita immittantur cucurbitæ vi-  
 treæ latæ & depressæ, atque arenæ  
 calore sensim aucto liquetur Camphora.  
 Remisso postea calore sublimetur massa  
 pellucida, a scoriis, confractò vitro,  
 separanda.

## CAUSTICUM ANTIMONIALE.

R. Salis communis ficcati Libram semis,  
 Croci Antimonii eloti,  
 Acidi Vitrioli fortis, singulorum Un-  
 cias tres.

Caute commisceantur in retorta vitrea  
 & mox fiat destillatio.

## CAUSTICUM LUNARE.

R. Argenti cupellati, in laminis, quan-  
 tum placet,  
 Acidi Nitri diluti Duplum pondus.  
 Digere ut argentum solvatur, deinde  
 coque donec exsiccet.

Massa remanens in crucibulo amplo  
 liquefcat ad ignem sensim auctum. Tum  
 effundatur in fistulas ferreas idoneas,  
 antea calefactas & sevi pauxillo inunctas.  
 Refrigerata vitro clauso serva.



## CAUSTICUM SALINUM.

R. Lixivii faponarii, per linteum colati, quantum placet.

Coque ad tertiæ partis remanentiam & dum etiam bulliens fit, adijce sensim Calcem ustam, (cum aquæ pauxillo in pulverem tritam,) donec liquorem absorberit & in pastam coacta sit, quæ vase vitreo bene occluso servanda est.

## CERA PURIFICATA.

R. Ceræ flavæ Unciam unam, Spiritus vini rectificati quantum factis est.

Triturando in mortario vitreo commisce, & per chartam cola. Massa unguinosa in colo manens fervetur.

## CERATUM ALBUM.

R. Olei olearum Libram semis, Spermatis Ceti Uncias tres, Ceræ albæ Uncias duas & dimidiam. Mixta liquefiant, & assidue agitentur, spathula lignea donec refrixerint.

Si radice Alkannæ tingitur, CERATUM LABIALE appellatur.



## CEREI MEDICATI.

R. Ceræ flavæ liquefactæ Libram unam,  
Spermatis Ceti Drachmas tres,  
Aceti Lithargyri Drachmas duas.

Commixtis, & ab igne remotis, immerge telas tenues, ex quibus fiant lege artis cerei.

Fiunt quoque cum Aceti Lithargyri duplo vel quadruplo.

## CINNABARIS FACTICIA.

R. Sulphuris Libram unam.  
In vase ferreo capaci liquefacto sensim adjice

Hydrargyri, prius calefacti, Libras quinque.

Agita continue spathula ferrea ut commisceantur: tum operculum adapta ligneum, ne inflammentur. Massa nondum refrigerata teratur in pulverem & vase vitreo sublimetur.

## COLCOTHAR VITRIOLI.

R. Vitrioli viridis quantum placet.  
Ad ignem validum uretur in vase ferreo, donec colorem rubrum habeat.



CONDITUM AURANTII  
CORTICIS.

Cortices Aurantii recentes in aqua fluviali, quotidie mutanda, macera donec mollescere incipiant. Mutata iterum aqua coque donec fatis molles sint. Tum cortices, ab albedine mundatos, cribro subverso impone, ut ab humore superfluo liberentur. Vasi vitreo deinde inditis affunde Syrupum simplicem, qui eos contegat. Post diem unum alterumve eximantur cortices, qui syrupo modico calore spissato atque refrigerato iterum injiciantur, & post aliquot dierum macerationem denuo eximantur. Syrupus residuus, cum Saccharo iterum ad justam spissitudinem reductus, postea corticibus adjiciatur, ut superemineat.

Eodem modo condiuntur CITRI CORTICES recentes, CYNOSBATA & ENULAE radix.

CONSERVA ACETOSELLAE.

Foliis recentibus Acetosellæ, minutim sectis, admisceatur Sacchari albissimi pulverati Par pondus.



Simili modo paratur CONSERVA ROSAE RUBRAE florum & CEREFOLII foliorum. Conserva vero COCHLEARIAE foliorum fiat cum Sacchari albissimi duplo pondere.

### CORNU CERVI USTUM.

Cornuum cervi frustra in furno urantur donec penitus albescant. Idem obtinetur si residuum post destillationem Liquoris & Olei Cornu cervi simili modo comburitur.

### CROCUS ANTIMONII.

R. Antimonii,  
Nitri, Par pondus.  
Separatim pulverata, deinde commixta, in mortario ferreo sensim detonent.

Si massa hæc refrigerata a scoriis albicantibus separatur, & contrita aquæ ferventis affusione repetita, abluatur donec prorsus insipida sit, CROCUS ANTIMONII ELOTUS obtinetur.

### CUPRUM AMMONIACUM.

R. Vitrioli cœrulei Unciam unam,  
E



Aquæ destillatæ Uncias tres.  
 Cum vitriolum aqua liquatum est, adjice  
 Alkali ammoniaci aquosi Uncias sex,  
 vel quantum satis sit ut cyaneum  
 colorem induat.  
 Liquorem per chartam colatum vase vi-  
 treo decoque, donec exsiccetur.

## DECOCTUM ALBUM.

R. Cornu Cervi usti præparati Unciam  
 semis,  
 Gummi arabici Unciam unam,  
 Aquæ fluvialis Libras tres.  
 Paullum ebulliant, & refrigeratis tritu-  
 rando admisce  
 Pastæ amygdalinæ Unciam unam.  
 Cola.

## DECOCTUM HORDEI.

R. Hordei, aqua calida aliquoties eloti,  
 Uncias tres,  
 Radicis Graminis concisæ Unciam  
 unam,  
 Aquæ fluvialis Libras decem.  
 Coque donec Libræ octo remaneant,  
 & decoctum refrigeratum cola.



Si Oxymellis simplicis Unciæ quatuor adduntur, DECOCTUM HORDEI ACIDULATUM appellatur.

## DECOCTUM LIGNORUM.

R. Rasuræ ligni Guajaci Uncias tres,  
 Juniperi Uncias duas,  
 Radicis Chinæ concisæ Unciam unam.  
 Aquæ fluvialis Libras duodecim.  
 Coque ad dimidium, sub finem coctionis addendo  
 Radicis Glycyrrhizæ Unciam semis.  
 Cola.

## ELATERIUM.

Fructus Cucumeris asinini fere maturi incidantur, ut in vas idoneum sine expressione succum demittant. Pars crassior subsidens, a liquore supernatante liberata, & modico calore ficcata, fervetur.

## ELECTUARIUM GINGIVALE.

R. Myrrhæ pulveratæ Drachmas tres,  
 Cremoris Tartari,



Coccinellæ, singulorum Drachmam unam & dimidiam.

Simul tritis in mortario vitreo admisce Mellis svecici liquefacti Uncias quatuor,  
Caryophyllorum pulveratorum Drachmam unam.

ELECTUARIUM E MANNA.

R. Mannæ electæ,  
Sacchari albissimi pulverati,  
Aquæ Fœniculi, singulorum Uncias duas.

Mixturam cola cum expressione: deinde admisce

Radici Iridis florentinæ, in tenuem pulverem tritæ, Drachmam unam,  
Olei amygdalini recentis Unciam unam.

ELECTUARIUM E SCORDIO.

R. Foliorum Scordii Uncias tres,  
Catechu,  
Fabæ Pechurim,  
Radici Tormentillæ, singulorum Uncias duas,  
Opii Drachmam unam & dimidiam,  
Mellis svecici Uncias viginti octo.



Opium ex Vino hispanico dilutum addatur Melli paullum calefacto, cui cætera, in pulverem trita, admisceantur.

Si diu servatum inarescit, ex Vino hispanico iterum conteratur donec iusta crassitudo fiat.

ELECTUARIUM E SENNA.

R. Foliorum Sennæ pulveratorum Uncias quatuor,  
Pulpæ Tamarindi Libram unam,  
Syrupi simplicis Uncias octo, vel quantum satis fit.  
Commisceantur.

ELIXIR ALOES SAPONACEUM.

R. Aloes socotrinæ,  
Alcali vegetabilis acetati,  
Bilis bubulæ spissatæ,  
Myrrhæ, singulorum Unciam unam.  
Simul terantur in mortario vitreo, deinde misceantur cum  
Crocii Unciam semis,  
Spiritus vini rectificati Libra una.  
Digere per triduum, vas subinde agitando, & per linteum cola.



## ELIXIR ALOETICUM.

R. Myrrhæ,  
 Croci, Singulorum Unciam unam,  
 Spiritus vini rectificati Uncias tri-  
 ginta duas.

Digere per triduum: deinde adde  
 Aloes socotrinæ Unciam unam & di-  
 midiam.

Digere iterum per biduum & per lin-  
 teum cola.

## ELIXIR FOETIDUM.

R. Castorei Unciam semis,  
 Assæ foetidæ Drachmas duas,  
 Opii Drachmam semis,  
 Salis Cornu cervi Drachmam unam,  
 Spiritus vini rectificati Uncias qua-  
 tuor.

Digere per quadriduum & per linteum  
 cola.

ELIXIR JALAPPÆ  
 COMPOSITUM.

R. Radicis Jalappæ Uncias quatuor,  
 Scammonii Aleppensis Unciam semis,  
 Gambogiæ Drachmas duas.

Incisis & contusis affunde



Spiritus vini rectificati Libras duas.  
Digere per triduum & exprimendo cola.

## ELIXIR PAPAVERIS.

R. Succi Glycyrrhizæ spiffati Unciam  
semis,  
Crocī,  
Opii, singulorum Scrupulos quin-  
que,  
Vini hispanici Uncias decem.  
Digere per quatrimum & cola.

## ELIXIR RHEI AMARUM.

R. Rhabarbari contusi Unciam unam,  
Radiciſ Gentianæ rubræ Drachmas  
duas,  
Canellæ albæ Drachmam unam,  
Vini hispanici Libram unam.  
Digere per triduum & exprimendo cola.

## ELIXIR RHEI COMPOSITUM.

R. Rhabarbari contusi Uncias duas,  
Cardamomi Drachmas duas,  
Alkali Tartari Scrupulum unum,  
Vini hispanici Uncias sedecim.



Digere per triduum, & liquori cum  
 expressione colato adjice,

Sacchari albi Uncias tres,  
 Extracti Enulæ Scrupulos decem,  
 Centaurii minoris Scrupulos  
 quatuor.

#### ELIXIR RHEI DULCE.

R. Rhabarbari contusi Uncias duas,  
 Cardamomi Drachmas duas,  
 Vini hispanici Libram unam.  
 Digere per triduum & exprimendo cola.

#### ELIXIR SENNAE.

R. Foliorum Sennæ Uncias quatuor,  
 Seminis Coriandri,  
 Foeniculi, singulorum Drach-  
 mas duas,  
 Vini hispanici Libras duas.  
 Digere per triduum. Tum adde  
 Passularum majorum exacinarum  
 Uncias tres.  
 Digere iterum per diem & exprimendo  
 cola.

#### EMPLASTRUM ADHAESIVUM.

R. Olei olearum Libras duas,



Lithargyri triti Libram unam,  
Ceruffæ Uncias quatuor.

Spathula lignea continue agitando coque  
modico igne, aquam ferventem subin-  
de instillando: & cum emplastri spiffi-  
tudinem habet, adjice

Ceræ flavæ Uncias octo,  
Terebinthinæ communis Uncias duas.

#### EMPLASTRUM E CALAMINARI LAPIDE.

R. Olei olearum Uncias sedecim,  
Lithargyri triti Libram semis.

Spathula continue agitando, & aquam  
ferventem subinde instillando, coque  
leniter ut unitas fiat. Tum per vices  
subigendo admisce

Calaminaris lapidis præparati Libras  
duas,

Ceræ flavæ Uncias quinque,  
Sevi bubuli curati,  
Terebinthinæ communis, singulorum  
Unciam unam & dimidiam.

#### EMPLASTRUM CITRINUM.

R. Ceræ flavæ Libram unam,



Refinæ Libram semis,  
 Sevi ovilli curati Uncias quatuor,  
 Olei olearum,  
 Terebinthinæ communis, singulo-  
 rum Uncias duas,  
 Curcumæ pulveratæ Drachmas duas.  
 Simul liquata cola.

Si AERuginis tritæ Drachmæ sex ad-  
 duntur, EMPLASTRUM VIRIDE dicitur.

#### EMPLASTRUM COMMUNE.

R. Olei olearum Libras sex,  
 Lithargyri triti Libras tres.  
 Spathula continue agitando, & aquam  
 ferventem subinde instillando, coque ad  
 modicum ignem, donec in unum coeant.

#### EMPLASTRUM E CONIO.

R. Ceræ flavæ Libram semis,  
 Olei olearum Uncias quatuor,  
 Gummi ammoniaci Unciam semis.  
 Simul liquatis admisce  
 Herbæ Conii pulveratæ Libram se-  
 mis.

Eodem modo paratur EMPLASTRUM EX  
 HYOSCYAMO.



EMPLASTRUM DIAPOMPHO-  
LYGOS.

R. Ceræ flavæ Libram unam,  
Olei olearum Libram semis.  
Colliquatis subigendo admisce  
Plumbi usti Libram semis,  
Cerussæ tritæ Uncias quatuor,  
Pompholygos Uncias tres,  
Olibani Unciam unam & dimidiam.

## EMPLASTRUM FOETIDUM.

R. Ceræ flavæ Uncias quatuor,  
Olei olearum Unciam unam.  
Simul liquefactis & ab igne remotis ad-  
misce  
Assæ foetidæ,  
Galbani, singulorum Uncias duas.

## EMPLASTRUM GUMMOSUM.

R. Emplastri communis Libram semis,  
Ceræ flavæ Unciam unam.  
Simul liquefactis & ab igne remotis ad-  
misce  
Gummi ammoniaci,  
Galbani, singulorum Unciam unam.



## EMPLASTRUM MERCURIALE.

R. Hydrargyri Unciam unam,  
Terebinthinæ venetæ Drachmas duas.  
Terantur in mortario vitreo donec intime commixta sint: tum subigendo addantur sequentibus simul liquatis, scilicet  
Emplastri communis Unciis duabus,  
Ceræ flavæ Unciæ semis.

## EMPLASTRUM SAPONATUM.

R. Emplastri communis Libram semis,  
Saponis veneti Uncias duas.  
Simul liquefiant.

## EMPLASTRUM VESICATORIUM.

R. Ceræ flavæ Libram semis,  
Terebinthinæ communis,  
Olei olearum, singulorum Unciam unam & dimidiam.  
Simul liquefactis admisce  
Cantharidum pulveratarum Uncias tres,  
Camphoræ Unciam semis.



EMULSIO SALINA.

R. Alkali vegetabilis tartarifati Drachmas duas,  
 Mellis svecici Unciam unam & dimidiam,  
 Aquæ fluvialis Libram unam.  
 Diluta triturentur in mortario marmoreo cum  
 Amygdalorum dulcium contuforum Uncia una.  
 Deinde cola.

EXTRACTUM ABSINTHII.

R. Summitatum Absinthii recentium quantum placet,  
 Aquæ fluvialis Duplum pondus.  
 Ad modicum ignem coque paulisper: deinde exprime liquorem. Residuum ex aqua iterum coque & exprimendo cola. Liquores mixti vaporent balnei maris calore ad justam crassitudinem.

Eodem modo para EXTRACTUM BETULAE, CARDUI BENEDICTI & TRIFOLII AQUATICI, foliorum, CENTAURII MINORIS & MILLEFOLII, summitatum, atque TARAXACI radice primo vere vel sero autumno collectæ.



## EXTRACTUM ACONITI.

Folia Aconiti recentia minutim concisa pauxillo Aquæ irrorentur. Succus inde expressus, sine prævia defæcatione, vaporet balnei maris calore donec ei mellis crassitudo sit. Tum admisce foliorum Aconiti, in pulverem tenuem tritorum, partem quartam.

Eodem modo para EXTRACTUM CEREFOLII & CONII, herbarum, atque HYOSCYAMI & STRAMONEI, foliorum.

## EXTRACTUM ALOES AQUOSUM.

R. Aloes hepaticæ Libram unam,  
Aquæ fluvialis frigidæ Libras quatuor,  
Succi Citri Libram unam.

In vase vitreo macera per unum alterumve diem, vas subinde concutiendo. Cum refina & fœces subsederint, diffunde liquorem & residuo aquam frigidam reafunde, donec parum admodum in eam recipiatur. Liquores colati calore balnei maris vaporent ad mellis crassitudinem.



EXTRACTUM COLOCYNTHIDIS  
COMPOSITUM.

R. Colocynthis a feminibus purgatæ  
Uncias duas.

Aquæ fluvialis Libras duas.  
Modico igne decoque ad dimidium, &  
humor colatus balnei maris calore va-  
poret donec ei mellis crassitudo fit.  
Tum admisce sequentia in pulverem te-  
nuem trita, scilicet

Aloes socotrinæ Uncias duas,  
Scammonei Aleppensis Unciam unam,  
Caryophyllorum Drachmam unam.

## EXTRACTUM JUGLANDIS.

Nuces Juglandis nondum maturæ  
(seu ad finem mensis Julii collectæ),  
cum aquæ tantillo mixtæ, contendantur  
in vase ligneo. Liquor inde expressus  
paullatim vaporet donec ei mellis cras-  
situs fit, caute evitando empyreuma.

## EXTRACTUM KINKINAE.

R. Corticis Kinkinæ contusi Libram  
unam,

Aquæ ferventis Libras duas.



Post unicam ebullitionem lenem cola exprimendo. Residuum coque iterum leniter ex Aquæ fluvialis Libris duabus & exprime liquorem; idque repete donec aqua nullum saporem inde extrahat. Liquores colati commisceantur & balnei maris calore vaporent ad justam spissitudinem.

Eodem modo para EXTRACTUM CASCARILLAE CORTICIS, ENULAE, GENTIANAE & RHABARBARI, radicum, atque NICOTIANAE foliorum ficcatorum.

#### EXTRACTUM THEBAICUM.

R. Opii contusi Libram semis,  
Aquæ fluvialis fervidæ Uncias octo.  
Digere donec opium dilutum sit, & liquorem calidum, exprimendo colatum, balnei maris calore redige in justam crassitudinem.

#### GELATINA CORNU CERVI.

R. Cornu Cervi rasi, aqua tepida aliquoties eloti, Libram semis,  
Aquæ fluvialis Libras septem.  
Ad modicum ignem coque, vase occlu-



fo, per septem vel octo horas. Liquori colato, etiamnum calenti, admisce  
Sacchari albissimi Uncias duas,  
Vini rhenani,  
Succi Citri, singulorum Unciam semis.  
Repone loco frigido ut fiat gelatina.

## HYDRARGYRUS PURIFICATUS.

Hydrargyrus e retorta vitrea destillet in vas recipiens vitreum, cui aqua fluvialis indita sit. Caveatur ne ignis tam validus sit, ut hydrargyrus quidquam secum in sublime rapiat.

## INFUSUM KINKINAE.

R. Corticis Kinkinae contusi Unciam unam & dimidiam,  
Aquae fluvialis fervidae Libram unam & dimidiam.

Digere per horas binas, vas subinde agitando: deinde cola cum expressione.

Si liquori colato adduntur Syrupi amygdalini Unciae duae, EMULSIO KINKINAE nominatur.

F



## INFUSUM RHEI.

R. Rhabarbari contusi Uncias duas,  
 Alkali Tartari Drachmam unam &  
 dimidiam,  
 Aquæ fluvialis ferventis Libram  
 unam & dimidiam.

In vase vitreo macera per duodecim ho-  
 ras & leniter exprimendo cola.

## INFUSUM SENNAE CITRATUM.

R. Foliorum Sennæ Drachmas sex,  
 Succi Citri Unciam semis,  
 Aquæ fluvialis bullientis Libram semis.  
 Macera per horam vase vitreo: deinde  
 cola.

Si succi Citri loco sumitur Pulpa  
 Tamarindi, INFUSUM SENNAE TAMA-  
 RINDATUM vocatur.

## KERMES MINERALE.

R. Antimonii crudi pulverati Libram  
 semis,  
 Alkali lignorum depurati Libras duas,  
 Aquæ fluvialis ferventis Libras octo.  
 In olla ferrea coque per horæ quadran-  
 tem, spathula continue agitando. Li-  
 quor etiamnum fervens per chartam cola-



tus quiete deponat pulverem, qui affusa  
Aqua, primum frigida deinde calida,  
sæpius abluatur donec insipidus fit.

LAC AMMONIACUM.

R. Gummi Ammoniacy purissimi Un-  
ciam semis,  
Aquæ Pulegii Uncias octo.  
In mortario vitreo tere donec Gummi  
dilutum fit.

LINCTUS LENIENS.

R. Gummi arabici contriti Drachmas  
duas,  
Aquæ Cerasi Unciam semis.  
In mortario vitreo triturando admisce  
Olei amygdalini recentis,  
Syrupi amygdalini, singulorum Drach-  
mas septem.

LINIMENTUM SAPONACEUM.

R. Spiritus Formicarum Libram unam,  
Saponis veneti Uncias duas.  
Digere donec Sapo liquatus fit: tum adde  
Camphoræ Unciam semis.



## LINIMENTUM VOLATILE.

R. Alkali ammoniaci caustici quantum placet,  
 Olei olearum Quadruplum pondus.  
 Misceantur conquassando.

LIQUOR ALKALINUS, OLEUM  
& SAL CORNU CERVI.

R. Cornu Cervi rasi quantum placet.  
 E retorta ferrea tubulata, cui adaptatum est vas recipiens amplum cum tubo intermedio, fiat destillatio igne sensim ad summum fere aucto. Ascendunt Liquor alkalinus, Oleum & Sal.

Liquor purificatur, si ab Oleo & Sale separatus, exiguo adhibito calore, iterum destillat.

Sal autem purificatur, si cum Alkali lignorum depurati pari pondere mixtum sublimatur.

LIQUOR CORNU CERVI  
SUCCINATUS.

R. Liquoris Cornu cervi alkalini Libram semis,



Salis Succini quantum satis est ad  
faturandum.

Mixta per chartam cola.

LIQUOR PROBATORIUS.

R. Calcis ustæ Unciam unam,  
Auripigmenti Unciam semis,  
Aquæ destillatæ Libram semis.

Mixta digere & per chartam cola.

LIXIVIUM SAPONARIUM.

R. Calcis recens ustæ, Uncias quatuor.  
In vase ferreo sensim affunde Aquæ ca-  
lidæ tantillum, ut Calx in pulverem fa-  
tiscat. Deinde adjice

Aquæ ferventis Libram unam & di-  
midiam,

Alkali lignorum depurati Uncias tres.  
Refrigerata injiciantur in infundibulum  
vitreum, cujus collo gossypium inditum  
fit, ut per hoc coletur lixivium. Tum  
iterum affunde Aquæ ferventis quan-  
tum satis sit ut lixivii eliciatur Libra una  
& dimidia. Lixivium illud in lagenis  
vitreis, epistomiis vitreis obturatis, ser-  
vandum est.



## LIXIVIUM TARTARI.

R. Alkali Tartari quantum placet,  
 Aquæ destillatæ Duplum pondus.  
 In vase vitreo misce & lixivium per  
 chartam cola.

## MAGNESIA ALBA.

R. Salis cathartici anglici,  
 Alkali lignorum depurati, singulo-  
 rum Par pondus.

In aquæ destillatæ quantitate sufficien-  
 ti separatim liquata, & per chartam co-  
 lata misceantur calide, & mox diluantur  
 Aquæ fervidæ Decuplo; bulliantque  
 paullum, spatula agitata. Mixtura calida  
 etiannum coletur per linteum, & Magne-  
 sia in illo manens, iterata aquæ destil-  
 latæ affusione diligenter abluta, siccetur.

## MAGNESIA USTA.

Magnesia alba uretur in crucibulo  
 igne fortiori, & in vitro sollicite clauso  
 fervetur.

Cum acidis non effervesceat si satis  
 usta est.



## MEL ROSACEUM.

R. Florum Rosæ rubræ ficcatorum Li-  
bram semis,  
Aquæ fluvialis bullientis Libras tres.  
Macera per duodecim horas & liquori  
colato admisce  
Mellis svecici Libras sex.

## MERCURIUS CALCINATUS.

In cucurbita vitrea alta, lata, angusti  
orificii, detineatur Hydrargyrus purifi-  
catus, modico & continuo arenæ calore,  
per plures menses, donec in pulverem  
rubrum redactus sit.

Orificium cucurbitæ charta leviter  
opertum sit ne fordes illabantur.

MERCURIUS CORROSIVUS  
ALBUS.

R. Hydrargyri purificati,  
Acidi Vitrioli concentrati, singulo-  
rum Libram semis.

In vase vitreo coque ad siccum. Mas-  
sam remanentem pulveratam misce  
cum



Salis communis siccati pulverati Unciis novem.

E cucurbita vitrea, ad tertiam tantum partem repleta, fiat sublimatio calore sensim aucto. Massa crystallina alba ad superiora cucurbitæ herens a scoriis purgata servetur.

Si massa hæc satis crystallina non apparet, Salis communis tantillo addito, sublimetur iterum donec crystallina & pura fiat.

### MERCURIUS CORROSIVUS RUBER.

R. Hydrargyri purificati Uncias duas.  
Acidi Nitri diluti Uncias tres.

In vase vitreo latioris fundi coque donec massa sicca resset, quam pulveratam valido calore ure, continue virga vitrea agitando donec rubrum habeat colorem.

### MERCURIUS DULCIS.

R. Hydrargyri purificati,  
Acidi Nitri diluti, singulorum Libram semis.

In cucurbita vitrea mixta, post dige-



stionem per aliquot horas coque, vas subinde agitando, donec Hydrargyrus solvatur. Liquor etiamnum fervens decantheur in vas vitreum, cui prius inditus sit alius liquor fervens, qui habet

Salis communis Uncias quatuor,  
Aquæ destillatæ Libras octo.

Postquam pulvis albus ad fundum vasis præcipitatus est, effundatur liquor limpidus supernatans, & pulvis remanens affusa sæpius aqua calida abluatur donec insipidus sit. Tum charta bibula exceptus leni calore ficcetur.

#### MIXTURA DIATRION.

R. Spiritus vini camphorati Uncias quinque,

Acidi Tartari destillati Uncias tres,  
Vitrioli tenuis Unciam unam.

Mixta tinge Baccarum Myrtilli Drachmis duabus: deinde cola.

#### MIXTURA MINERALIS.

R. Mercurii corrosivi albi Grana sex,

Aquæ destillatæ Uncias novem,



Aquæ Cinnamomi Uncias duas,  
 Spiritus vini rectificati,  
 Syrupi Althææ, singulorum Unciam  
 unam.  
 Misceantur.

## MIXTURA SALINA.

R. Alkali herbarum fixi Drachmam  
 unam,  
 Aquæ fluvialis Uncias quinque.  
 Lixivio adjice  
 Succi Citri Uncias duas, vel quan-  
 tum satis est ad saturandum,  
 Syrupi simplicis Unciam semis.

## MORSULI AROMATICI.

R. Sacchari albissimi Libram unam.  
 Cum aquæ tantillo incoque donec gutta  
 inde extracta indurescat. Tum adjice  
 Amygdalorum dulcium decorticato-  
 rum & minutim concisorum,  
 Conditi corticis Aurantii concisi, sin-  
 gulorum Unciam unam,  
 Cinnamomi ceylanici pulverati Un-  
 ciam semis,



Zingiberis pulverati Scrupulum  
unum.  
Fiant morsuli.

## MORSULI CITRI.

R. Sacchari albissimi pulverati Uncias  
quatuor.  
Leniter calefacto adjice  
Succi Citri concentrati Unciam semis.  
Fiant morsuli.

## NITRUM PURIFICATUM.

Nitrum in aqua liquetur. Liqueor  
per chartam colatus vaporet donec gut-  
ta in laminam vitream cadens, crystal-  
linas fibras habeat. Tum loco frigido  
reponatur ut crystalli fiant.

OLEUM ABSINTHII  
STILLATICIUM.

R. Summitatum Absinthii recentium  
quantum placet,  
Aquæ puræ quod satis sit ut Absin-  
thium innatet.  
Ad modicum ignem destillet una cum  
aqua Oleum, quod ab illa separatum  
fervetur.



Eodem modo eliciantur cætera olea stillaticia, ut ex ANISI, CARVI & FOENICULI, feminibus, JUNIPERI baccis, CHAMOMILLAE VULGARIS, LAVENDULAE & TANACETI, floribus, MENTHAE PIPERITIDIS & ROSMARINI, herba vel summitatibus, CARYOPHYLLIS, CINNAMOMO & PIPERE JAMAICENSI.

Caryophylli & Cinnamomum prius macerentur & in vase humili destillationi subjiciantur.

#### OLEUM AMYGDALINUM.

R. Amygdalorum dulcium non rancidorum quantum placet.

In mortario lapideo vel ferreo contundantur & ex illis, sacco inclusis, exprimatur Oleum prelo paulum calefacto.

Eodem modo e feminibus exprimitur OLEUM HYOSCYAMI, LINI & RICINI.

#### OLEUM CACAO.

E nucleis Cacao leniter tostis, & a cortice purgatis, prelo tepesfacto exprime oleum.



## OLEUM CAMPHORATUM.

R. Olei olearum Unciam unam,  
Camphoræ Unciam semis.

Misce ut diluatur camphora.

Fit quoque cum Oleo Lini.

## OLEUM CERAE.

R. Ceræ flavæ,

Calcis ustæ pulveratæ, singulorum

Par pondus.

E retorta vitrea destillet Oleum.

OLEUM CORNU CERVI  
RECTIFICATUM.

R. Olei Cornu Cervi Libras duas.

Immitte cucurbitæ vitreæ per infundibulum vitreum longiore collo instructum, ne latera cucurbitæ inquinentur. Per alembicum vitreum longiore rostro præditum, modico deinde calore continuet destillatio tamdiu oleum limpidum elicitur. Quod in vas recipiens destillavit, ex alia cucurbita vitrea eodem modo iterum destillet, donec id quod destillando elicatum fuerit, Spiritus instar tenue & limpidum fit. Oleum hoc



servetur in lagenis vitreis parvis bene  
occlusis & in aqua subversis.

### OLEUM HYPERICI.

R. Summitatum Hyperici Libram unam,  
Olei olearum Libras duas.

Vase vitreo macera per aliquot dies, donec  
colorem rubrum habeat Oleum, quod  
tum coletur.

### OLEUM LILII ALBI.

R. Petalorum Lillii albi nuper expan-  
sorum Libram unam & dimidiam,  
Olei olearum Libras tres.

Vase vitreo Oleum cum petalis ferva.

### OLEUM LATERITIUM.

Lateres in frustula confracti, & igne  
candefacti, oleo olearum immergan-  
tur, donec illo imbuti sint. Oleo de-  
inde exempti & contusi retortæ immit-  
tantur atque destillando eliciatur Oleum.

### OLEUM OVI.

R. Ovorum recentium quantum placet.  
Coque ut indurentur penitus: deinde



vitellos exime & comminutos assa leniter in sartagine, donec inter digitos preffi pinguedinem quandam emittant. Tum ferventes etiamnum indentur faculo, e fetis equinis contexto, & exprimatur Oleum.

## OLEUM ET SAL SUCCINI.

R. Succini fragmentorum quantum placet.

Ex retorta vitrea, recipiente capaci adaptato, fiat destillatio modico igne, ut phlegma primum ascendat, dein Sal Oleo tinctum. Tum auferatur recipiens vas & Sal e collo retortæ eximatur. Mutato recipiente, & aucto igne, eliciatur Oleum flavum, rubrum ac tandem fuscum.

Sal super chartam bibulam ficcetur: quod autem oleo inquinatum est, in phlegmate proprio & Spiritus vini rectificati pauxillo diluatur, atque liquor per chartam colatus, post lenissimam exhalationem seponatur ut crystalli fiant.

Oleum e retorta vitrea, aquæ puræ sextuplo addito, iterum destillet & tum OLEUM SUCCINI RECTIFICATUM appellatur.



OLEUM TEREBINTHINAE  
AETHEREUM.

R. Olei Terebinthinæ,  
Aquæ fluvialis, singulorum Pares  
portiones.  
Fiat destillatio quamdiu prodit Oleum.

OSTREARUM TESTAE  
PRAEPARATAE.

Testæ ostrearum cavæ aqua fervida  
a sordibus purgatæ, deinde siccatae, in  
mortario ferreo tenuissime pulverentur.

OSTREARUM TESTAE USTAE.

Ostrearum testæ, repetita ablutione  
mundatæ, igne valido urentur, ut can-  
didæ intus & friabiles reddantur.

OXYMEL AERUGINIS.

R. AEruginis tritæ Uncias quinque,  
Aceti vini Uncias septem,  
Mellis svecici Uncias quatuordecim.  
Diligenter spatula agitando coque do-  
nec unguenti crassitudinem habeat.



## OXYMEL SCILLITICUM.

R. Aceti scillitici Libram unam,  
Mellis svecici Libras duas.  
Tepide commisceantur vase vitreo.

## OXYMEL SIMPLEX.

R. Aceti vini Libram unam,  
Mellis svecici Libras duas.  
In vase vitreo tepide commisceantur.

## PASTA ALTHAEAE.

R. Radicis Althææ decorticatæ Uncias  
quatuor,  
Aquæ fluvialis Libras octo.  
Coque ad dimidium. Humori perco-  
lato admisce  
Gummi arabici pulverati Libram  
semis,  
Sacchari albi pulverati Libras duas.  
Modico igne decoque, baculo ligneo  
diligenter agitando, donec extracti cras-  
situdinem habeat. Tum ab igne remo-  
tum celeriter & multum agita, subinde  
adjiciendo



Albumen ex duodecim ovis recentibus in spumam conquassatum,  
Aquæ Aurantii Unciam semis.

Exiguo adhibito calore continue agitur, donec massa manibus non adhæreat: deinde formentur pastæ, pulvere Amyli conspergendæ.

#### PASTA AMYGDALINA.

R. Amygdalorum dulcium decorticatorum Libram unam,  
amarorum decorticatorum Unciam semis.

Mixta contundantur in mortario lapideo, adjecta Aqua Aurantii. Deinde admisceatur

Sacchari albissimi pulverati Libra una.  
Fiat massa, quæ manibus tractata eis non adhæreat.

#### PASTA GLYCYRRHIZÆ.

R. Radicis Glycyrrhizæ decorticatæ & contusæ Libram semis,  
Aquæ fluvialis ferventis Libram unam.



Macera per duodecim horas & humori percolato admisce

Gummi arabici pulverati Libram semis,

Sacchari albissimi pulverati Libras duas.

Caute evitando empyreuma vaporet donec gutta lapidi polito frigido instillata gelatinæ instar concrescat. Tum per duos dies detineatur loco calido & detracta pellicula, in patellas Olei amygdalini tantillo illitas, effundatur massa, calore modico ficcanda.

PILULAE ALOETICAE.

R. Extracti Aloes aquosi Unciam unam, Colocynthis compositi Unciam semis,

Aethiopsis martialis Drachmas duas.

Commixta Syrupo simplici cogantur in massam, ex qua formentur pilulae, quarum singulae Granum unum habeant.

PILULAE CATHARTICAE.

R. Extracti Colocynthis compositi Drachmas duas & dimidiam,



Mercurii dulcis Drachmam unam,  
 Resinæ Jalappæ contritæ Scrupulos  
 duos,  
 Caryophyllorum pulveratorum Scru-  
 pulum unum.

Commixta Syrupo simplici cogantur in  
 massam, ex qua formentur pilulæ, quæ  
 singulæ Grana duo habeant.

#### PILULAE EX ELATERIO.

R. Gummi ammoniaci purissimi Uncias  
 duas,  
 Aloes socotrinæ,  
 Gambogiæ, singulorum Drachmas  
 duas,  
 Elaterii contriti Drachmam semis.

Misce & Tinctura amara coge in mas-  
 sam, unde formentur pilulæ, quarum  
 singulæ Grana duo contineant.

#### PILULAE FOETIDAE.

R. Assæ foetidæ,  
 Castorei, singulorum Drachmam u-  
 nam & dimidiam,  
 Salis Succini Drachmam semis,  
 Olei Cornu Cervi Scrupulum semis.  
 Commixta Tinctura Myrrhæ coge in



massam, unde formentur pilulæ, quarum singulæ Grana duo habeant.

PILULAE E MERCURIO CORROSIVO ALBO.

R. Mercurii corrosivi albi,  
Salis ammoniaci depurati, singulorum Scrupulum unum,  
Aquæ destillatæ quantum satis est ut deliquescant.

Deinde adjice  
Radici Althææ pulveratæ Scrupulos sedecim,  
Mellis svecici Drachmas duas.

Mixta coge in massam, ex qua fiant pilulæ, quæ singulæ Grana tria habeant.

PILULAE POLYCHRESTAE.

R. Extracti Gentianæ Unciam unam,  
Aloes socotrinæ,  
Crocii,  
Myrrhæ, singulorum contritorum Unciam semis.

Commixta Syrupo simplici cogantur in massam, ex qua fiant pilulæ, qua-



rum unaquæque Granum unum habeat.

### PILULAE SAPONACEAE.

R. Saponis albi Uncias duas,  
 Extracti Betulæ Unciam unam.  
 Cogantur in massam, ex qua fiant pilulæ, quæ singulæ Grana tria contineant.

### PILULAE E STYRACE.

R. Styracis depuratæ Scrupulos quinque,  
 Succi Glycyrrhizæ spissati Drachmas tres,  
 Opii Drachmam unam.  
 Opium ex Vino hispanico dilutum admisceatur cæteris ut massæ spissitudo fiat. Formentur inde pilulæ, quæ singulæ Grana duo contineant.

### PLUMBUM USTUM.

Plumbum igne liquatum assidue agitetur spatula ferrea, donec in pulverem redactum sit.



## PULPA TAMARINDI.

Fructum Tamarindi in aqua fluviali calida macera ut medulla deliqueſcat, quæ percolata balnei maris calore vaporet, donec juſtam habeat craſſitudinem. Singulis pulpæ Libris tum admiſce

Mellis ſvecici Unciam ſemis.

Eodem modo paratur PULPA CASSIÆ.

## PULVIS ALEXITERIUS.

R. Alkali vegetabilis vitriolati Drachmas novem,  
Ipecacuanhæ,  
Opii, ſingulorum Drachmam unam.  
Commifceantur.

PULVIS ANTIMONII  
MARTIALIS.

R. Antimonii præparati Uncias duas,  
Lapidum cancrorum Unciam unam  
& dimidiam,  
Salis martis Unciam ſemis.  
Commifceantur.



## PULVIS ARI COMPOSITUS.

R. Radicis Ari Drachmas duas,  
Calami vulgaris,  
Pimpinellæ, singulorum  
Drachmam unam,  
Canellæ albæ Drachmam semis,  
Alkali herbarum fixi Scrupulum  
unum.  
Commixta vase bene clauso fervantur.

## PULVIS CORDIALIS.

R. Sacchari albissimi Unciam unam,  
Cinnabaris facticiæ Drachmas duas,  
Olei Cinnamomi Guttas sedecim.  
Misce terendo & vitro bene clauso serva.

## PULVIS DENTIFRICIUS.

R. Aluminis usti.  
Coccinellæ, singulorum Scrupulum  
semis.  
Simul tritis admisce  
Ossis sepiaë,  
Corallii rubri præparati, singulorum  
Drachmas sex.



## PULVIS DIGESTIVUS.

R. Salis cathartici anglici,  
Rhabarbari, singulorum Pares por-  
tionēs.  
Commisceantur.

PULVIS JALAPPÆ COM-  
POSITUS.

R. Radicis Jalappæ,  
Gentianæ rubræ, singulo-  
rum Unciam unam,  
Salis cathartici anglici Uncias duas.  
Commisceantur.

## PULVIS INFANTUM.

R. Magnesiæ albæ Unciam unam,  
Rhabarbari in tenerrimum pulverem  
contriti Drachmam unam.  
Commisceantur.

## PULVIS NITROSUS.

R. Nitri purificati Uncias tres,  
Salis Acetofellæ Unciam unam,  
Sacchari albissimi Uncias decem.  
Commisceantur.



## PULVIS SEDATIVUS.

R. Opii Scrupulum semis,  
Nitri purificati Scrupulos quinque  
cum dimidio,  
Sacchari albissimi Unciam unam.  
Commisceantur.

PULVIS SENNAE COM-  
POSITUS.

R. Foliorum Sennæ Uncias duas,  
Scammonei Aleppensis Unciam unam,  
Cremoris Tartari Uncias quatuor.  
Commisceantur.

## RESINA JALAPPÆ.

R. Radicis Jalappæ contusæ quantum  
placet,  
Spiritus vini rectificati quantum sa-  
tis est ut radicem contegat.

Digere per unum alterumve diem.  
Spiritus per chartam cola, aliumque  
residuo affunde, digere & cola. Hoc  
toties fiat, donec spiritus nihil inde ex-  
trahat. Tincturæ commixtæ ad dimi-



dium vaporent &, addendo aquam puram frigidam, præcipitent refinam, quæ ficcata fervetur.

### ROB JUNIPERI.

R. Baccarum Juniperi maturarum, paululum contusarum, quantum placet. Affusa aqua fluviali macerentur per diem unum alterumve, vase ligneo convenienti, cujus fundus foramine præditus, bacillis ligneis & stramine puro contactus fit. Liquorem deinde foramine aperto trajectum, toties reafunde, donec baccæ insipidæ sint. Liquor tum coletur & supra modicum ignem decoquatur ad mellis spissitudinem.

### ROB SAMBUCCI.

R. Succis e baccis Sambuci maturis expressi Libras quatuor,  
Sacchari albi Libram semis.

Modico igne incoque ad mellis spissitudinem.

Eodem modo paratur ROB RIBIS NIGRI.



## SACCHARUM LACTIS.

R. Seri lactis cum coagulo parati quantum placet.

Supra modicum ignem decoquatur ad syrapi crassitudinem. Tum reponatur loco frigido ut crytalli formentur. Liquor superstes iterum decoquatur, ut in loco frigido crytallo ponat, quæ aqua frigida abluantur.

## SAL ACETOSELLÆ.

R. Succis ex foliis Acetosellæ expressi quantum placet.

Leniter ebulliat ut fæces separentur, deinde toties percoletur donec limpidus fit, & tum decoquatur modico igne ad syrapi crassitudinem. Vasis vitreis angustioris colli inditus loco frigido reponatur, ut fiant crytalli, quæ ex aqua fluviali dilutæ, iterum in crytallo puriores concrefcant.

## SAL ACIDUM BORACIS.

R. Boracis Unciam unam & dimidiam,  
Aquæ fluvialis fervidæ Libram unam.  
In vase vitreo misce ut Borax dissolvatur. Tum instilla



Acidi Vitrioli concentrati Drachmas  
tres.

Liquor vaporet donec pellicula appa-  
reat, & quiete crystallos demittat, quæ  
aqua frigida ablutæ ferventur.

SAL AMMONIACUM  
DEPURATUM.

Sal ammoniacum ex aqua fluviali dilu-  
atur, & liquor, per chartam colatus,  
in vase vitreo vaporet ad ficcum, mo-  
dico adhibito igne.

SAL AMMONIACUM MARTIALE.

R. Ferri limaturæ Libram semis,  
Salis ammoniaci Libram unam.  
Commixta humectentur aquæ pauxillo,  
& ficcata conterantur in mortario fer-  
reo; idque fiat ter vel quater. Igne  
mox sufficiente instituat deinde subli-  
matio ex cucurbita alembico instructa.

SAL BENZOINUM.

R. Benzoës pulveratæ,  
Calcis ustæ pulveratæ, singulorum  
Libram semis,



Aquæ fluvialis Libras duas.

Coque leniter per quadrantem horæ, & liquorem calidum etiamnum per chartam cola. Residuum iterum leniter coque ex aquæ Libris duabus &, ut antea, cola.

Liquoribus percolatis atque refrigeratis instilla Acidum Salis communis tamdiu aliquid præcipitatur. Quod in fundo manet aqua frigida abluatur &, charta bibula exceptum, ficcetur.

### SAL MARTIS.

R. Acidi Vitrioli fortis Uncias octo;

Aquæ fluvialis Libras duas.

Caute commixtis adjice

Ferri limaturæ purissimæ Uncias quatuor.

Digere per duodecim horas. Liquor deinde, per chartam colatus, vaporet ad pelliculæ apparitionem, & loco frigido reponatur, ut cryсталlos demittat. Liquor remanens iterum leniter vaporet, ut cryсталlos deponat, quæ collectæ super chartam ficcantur.



## SAL SATURNI.

R. Ceruffæ pulveratæ quantum placet,  
Aceti destillati quod satis fit.

In vase fictili coque, donec acetum dulcescat, quod tum per chartam coletur. Residuo affunde iterum

Aceti destillati quantum satis est.

Incoque, & cola ut antea. Liquores tandem commixti vase vitreo vaporent ad mellis liquidioris spissitudinem, ut loco frigido crysalli demittantur.

## SCILLA SICCATA.

Bulbi Scillæ recentes, ablato cortice exteriori, secantur in taleolas tenues, quæ lenissimo calore siccantur.

## SERUM LACTIS CLARIFICATUM.

R. Lactis vaccini recentis Libras sex,  
Coaguli vitulini ex aqua diluti Drachmam unam, vel quantum satis fit.  
In vase fictili cooperto stent per aliquot horas supra cineres calidos, donec lac dense coagulatum fit. Sero inde sepa-



rato, & per linteum colato, immisce.

Albumen trium ovorum in spumam agitatum & cum Cremoris Tartari Drachma semis mixtum.

Bulliant paullum, & ferum per chartam coletur.

SPIRITUS AETHEREUS  
NITRATUS.

R. Spiritus vini rectificatissimi Libras duas.

In retorta vitrea capaci paullatim adjice Acidi Nitri fumantis Libram semis. Mixta stent per duodecim horas & balnei maris calore destillando eliciatur circiter Libra una & dimidia.

Rite paratus cum alkalinis non effervescat.

SPIRITUS AETHEREUS  
VITRIOLATUS.

R. Spiritus vini rectificatissimi Libras novem.

In retorta vitrea, paullatim instillando, admisce



Acidi Vitrioli concentrati Libras tres.  
Excipulo mox adaptato supra modicum ignem destillet primum pars dimidia. Mutato vase recipiente eliciantur deinde Unciæ circiter octo; idque toties repetatur, donec odor prodire incipiat sulphureus. Ultimo hoc abjecto, commisceantur cæteri liquores, & vasis bene occlusis serventur.

## SPIRITUS AROMATICUS.

R. Summitatum Rosmarini Libram unam  
& dimidiam,

Millefolii,

Herbæ Thymi, singulorum Libram  
semis,

Spiritus vini gallici Libras sedecim.  
Macera per biduum & destillando elice  
Libras octo.

Si, ante destillationem, Aceti vini  
Libræ octo admiscentur, SPIRITUS ARO-  
MATICUS ACETATUS obtinetur.

## SPIRITUS AURANTII.

R. Corticis Aurantii recentis Libram  
unam,

H



Spiritus vini gallici Libras tres.  
Balnei maris calore destillent Libræ duæ.

## SPIRITUS COCHLEARIAE.

R. Herbæ Cochleariæ recentis Libras  
decem,  
Spiritus vini gallici Libras octo.  
Balnei maris calore destillent Libræ qua-  
tuor.

## SPIRITUS FORMICARUM.

R. Formicarum, mensibus Junii & Julii  
cum acervo collectarum, Libram  
unam,  
Spiritus vini gallici Libras duas,  
Aquæ fluvialis Libram unam.  
Calore balnei maris destillet Libra una  
& dimidia.

## SPIRITUS LAVENDULAE.

R. Florum Lavendulæ recentium Li-  
bram unam & dimidiam,  
Spiritus vini gallici Libras octo.  
Balnei maris calore destillando elice Li-  
bras quatuor.



SPIRITUS LAVENDULÆ  
COMPOSITUS.

R. Spiritus Lavendulæ Libras tres,  
Rosmarini Libram unam,  
Cinnamomi ceylanici,  
Nucis moschatæ, singulorum Un-  
ciam semis,  
Santali rubri Drachmas tres.  
Macera per quatuor dies, & cola.

SPIRITUS ROSMARINI.

R. Summitatum Rosmarini recentium  
Libras duas,  
Spiritus vini gallici Libras octo.  
Blanei maris calore destillent Libræ qua-  
tuor.

SPIRITUS VINI CAMPHORATUS.

R. Spiritus vini rectificati Uncias fede-  
cim,  
Camphoræ Unciam unam.  
Commisceantur.

SPIRITUS VINI RECTIFICATUS.

R. Spiritus vini gallici quantum placet.



Ex vesica per alembicum stanneum destillet dimidium, supra modicum ignem.

Si hujus spiritus rectificati tertia pars destillando elicitur, habetur SPIRITUS VINI RECTIFICATISSIMUS, *Alcohol* dictus, cujus pondus sit ad aquam destillatam, ut 890 ad 1000.

#### SPONGIA CERATA.

Spongiam tenuem siccatam, & ab arenulis purgatam, immerge Ceræ flavæ liquefactæ. Spongiam deinde fortiter expressam serva.

#### STYRAX DEPURATA.

Styrax Spiritu vini rectificato diluta, per chartam coletur, & supra exiguum ignem detineatur donec omnis Spiritus consumtus sit.

#### SULPHUR PRAECIPITATUM.

R. Sulphuris contusi quantum placet,  
Calcis recens ustæ, Triplum pondus,  
Aquæ fluvialis quantum satis est.  
Coque ut sulphur dissolvatur. Liquori  
deinde per chartam colato instilla



Acetum vini, ut demittat pulverem,  
qui aqua ablutus ficcetur.

SYRUPUS ACETI.

R. Aceti vini Libras duas,  
Sacchari albissimi Libras quatuor.  
In vase vitreo tepide commisceantur.

SYRUPUS ALLII.

R. Allii recentis concisi Libram unam,  
Aquæ fluvialis ferventis Libras duas.  
Vase clauso macera per horam. Liquori  
percolato adjice  
Sacchari albissimi Libras duas.

SYRUPUS ALTHAEAE.

R. Radicis Althææ decorticatæ Libram  
semis,  
Aquæ fluvialis Libras sex.  
Coque donec humidi tertia pars consumpta  
sit. Liquori exprimendo colato, & sub-  
sidentia depurato, admisce  
Sacchari albissimi Libras sex.  
Modico igne coque ut syrapi spissitudo  
fiat, cui refrigerato adjice  
Aquæ Aurantii Uncias duas.



## SYRUPUS AMYGDALINUS.

R. Amygdalorum dulcium Libram unam,  
amarorum Drachmas  
duas.

Decorticatis & in mortario lapideo cum  
pistillo ligneo contusis sensim adjice  
Decocti hordei Libras duas.

Liquori exprimendo colato admisce  
Sacchari albissimi pulverati quantum  
fatis est, ut fyrupi spissitudinem  
habeat.

## SYRUPUS ARMORACIAE.

Succo e radice Armoraciæ recenter  
expresso admisce Sacchari albissimi pul-  
verati quantum fatis est, ut habeat fyru-  
pi crassitudinem.

SYRUPUS AURANTII  
CORTICIS.

R. Flavedinis e cortice Aurantii recenti  
Libram semis,  
Aquæ fluvialis ferventis Libras tres.  
Vase clauso digere per biduum. Liqueo-  
ri colato adjice



Sacchari albissimi quantum satis est,  
ut fyrupi crassitudo fit.

SYRUPUS CITRI CORTICIS.

R. Flavedinis e cortice Citri recenti Un-  
cias tres,  
Aquæ fluvialis ferventis Libras tres.  
Vase clauso macera per horam & liquo-  
ri colato adjice  
Aquæ Aurantii Unciam unam & di-  
midiam,  
Sacchari albissimi quantum satis est,  
ut fiat fyrupi crassitudo.

SYRUPUS CITRI E SUCCO.

R. Succu Citri recens expressi, & de-  
fæcati, Libram unam,  
Sacchari albissimi Libras duas.  
In vase vitreo commisceantur.

Eodem modo paratur Syrupus ex  
succo fructuum, CERASI NIGRI cum  
nucleis, MYRTILLIS, OXYCOCCI, RIBIS  
NIGRI, RUBI ARCTICI, & RUBI IDAEI.

SYRUPUS HYDRARGYRI.

R. Hydrargyri purificati Drachmam  
unam, H 4



Gummi arabici Drachmas tres,  
Aquæ Rosæ quantum fatis est ut  
gummi diluatur in mucum.

In mortario vitreo conterantur, donec  
Hydrargyrus prorsus dispareat. Deinde  
paulatim admisce

Syrupi simplicis Uncias quatuor.

#### SYRUPUS PAPAVERIS.

R. Capitem Papaveris nondum matu-  
rorum, ficcatorum & a feminibus  
purgatorum, Uncias quatuorde-  
cim,

Aquæ fluvialis bullientis quod fa-  
tis fit,

Macera per duodecim horas & leniter  
incoque, ut humoris inde expressi &  
colati supersint Libræ duæ. Huic de-  
inde adjice

Sacchari albissimi pulverati Libras  
quatuor.

#### SYRUPUS RHEI.

R. Infusi Rhei quantum placet,

Sacchari albissimi Duplum pondus.  
Commisceantur.



## SYRUPUS SCILLITICUS.

R. Scillæ ficcatae Unciam unam,  
 Zingiberis Unciam semis,  
 Herbæ Hyssopi Uncias duas,  
 Aquæ Hyssopi Libras duas.

Vase vitreo clauso macera per nycthe-  
 meron. Liquorem exprimendo cola, &  
 defæcato adjice

Sacchari albissimi Libras tres.  
 Paullum coquendo fiat syrurus.

## SYRUPUS SIMPLEX.

R. Aquæ fluvialis quantum placet,  
 Sacchari albissimi Duplum pondus.  
 Paullum coquendo fiat syrurus.

## SYRUPUS VIOLAE.

R. Florum Violæ recentium, a calyci-  
 bus purgatorum, Libram unam,  
 Aquæ destillatæ Libras tres.

Vase vitreo macera per duodecim horas.  
 Liquori colato & subsidentia depurato,  
 adjice

Sacchari albissimi quantum satis sit,  
 ut syruri crassitudinem habeat.



## SYRUPUS ZINGIBERIS.

R. Zingiberis concisi Unciam unam,  
Aquæ ferventis Libram unam.  
Vase vitreo digere per sex horas, & li-  
quori colato adjice  
Sacchari albissimi quantum satis sit,  
ut habeat fyrupi crassitudinem.

## TARTARUS ANTIMONIALIS.

R. Croci Antimonii eloti pulverati, Un-  
cias tres,  
Cremoris Tartari Uncias duas.  
Commixta injiciantur paullatim in  
Aquæ fluvialis bullientis Libras qua-  
tuor.

Incoque leniter per horam, spathula  
sæpius agitando. Liquor calidus etiam-  
num per chartam coletur et, vase vitreo  
lato, vaporet, exiguo adhibita calore,  
donec exsiccetur.

## TARTARUS MARTIALIS.

R. Tartari crudi pulverati Libras qua-  
tuor,  
Squamaram ferri purissimarum Li-  
bram unam & dimidiam,



Aquæ fluvialis Libras quadraginta  
oçto.

In vase ferreo coque, donec sapor non  
fit acidus. Liquor decanthatus modico  
calore vaporet ad ficcum, sollicite ca-  
vendo ne aduratur.

## THERIACA.

R. Radicis Angelicæ Uncias oçto,  
Gentianæ rubræ Uncias sex,  
Valerianæ Uncias tres,  
Zedoariæ,

Cardamomi minoris, singulorum Un-  
cias duas,

Croci,

Glycyrrhizæ succi spiffati,

Myrrhæ,

Opii, singulorum Unciam unam,

Mellis svecici Triplum ad pondus  
omnium, vel Uncias septuaginta  
& quinque.

Glycyrrhizæ succus, Myrrha & Opium,  
ex Vino hispanico diluta, primum mi-  
sceantur cum Melle paullum calefacto:  
deinde, sub continua agitatione, paul-  
latim adjiciantur cætera, in pulverem  
tenuem trita.



Si diu servatâ inarescit, Vino hispanico admixto redigatur in justam spissitudinem.

#### TINCTURA AMARA.

R. Summitatum Absinthii Uncias duas,  
Foliorum Cardui benedicti,  
Fructus immaturi Aurantii,  
Galangæ, singulorum Unciam semis,  
Spiritus vini gallici Libras duas.

Digere per triduum: deinde per chartam cola.

#### TINCTURA AROMATICA.

R. Canellæ albæ,  
Cinnamomi ceylanici,  
Galangæ, singulorum Unciam semis,  
Cardamomi minoris Drachmas duas,  
Spiritus vini rectificati Libram unam.  
Macera per triduum & per chartam cola.

#### TINCTURA AROMATICA VITRIOLATA.

R. Tincturæ aromaticæ Libram unam,  
Acidi vitrioli concentrati Uncias duas.  
Sensim commixta stent per aliquot dies,  
et tum decantha tincturam.



## TINCTURA AURANTII.

R. Flavedinis e cortice Aurantii recenti Libram semis,

Spiritus vini rectificati Libras tres.  
Macerata per triduum; deinde per chartam cola.

Si, Spiritus vini rectificati loco, sumitur Spiritus Aurantii, & tincturæ adduntur Sacchari albissimi pulverati Unciæ novem, TINCTURA AURANTII DULCIS appellatur.

## TINCTURA BENZOES.

R. Benzoës Uncias duas,

Spiritus vini rectificati Libram unam.  
Digere per triduum, atque per chartam cola:

## TINCTURA CANTHARIDIS.

R. Cantharidum contusarum Unciam unam,

Spiritus vini rectificati Libram unam.  
Macerata per triduum, atque per chartam cola.



## TINCTURA CASTOREI.

R. Castorei Uncias tres,  
Spiritus vini rectificati Libram unam.  
Digere per triduum: deinde per chartam cola.

## TINCTURA COLOCYNTHIDIS.

R. Colocyntidis minutim concisæ, & a  
feminibus liberatæ, Unciam unam,  
Anisi stellati Drachmam unam,  
Spiritus vini gallici Uncias quatuordecim.

Macera per triduum, atque per chartam cola.

## TINCTURA FULIGINIS.

R. Fuliginis splendentis contusæ Uncias duas,  
Alkali lignorum depurati Libram semis,  
Salis ammoniaci Unciam unam,  
Aquæ fluvialis Libras tres.

Digere per triduum, atque per chartam cola.



## TINCTURA GUAIACINA.

R. Refinæ Guajaci Unciam unam,  
Alkali ammoniaci spirituosi Libram  
femis.

Macera per triduum: deinde cola.

## TINCTURA KINKINAE.

R. Corticis kinkinæ contusi Uncias duas,  
Spiritus vini gallici Libram unam  
cum dimidia.

Digere per triduum: deinde per char-  
tam cola.

Eodem modo paratur TINCTURA  
QUASSIAE.

## TINCTURA LACCAE.

R. Laccæ in granulis contritæ Unciam  
unam,  
Myrrhæ Drachmas tres,  
Spiritus Cochleariæ Libram unam  
cum dimidia.

Digere per triduum: deinde cola.

## TINCTURA MARTIS.

R. Squamarum ferri purissimarum Un-  
cias duas,



Spiritus vini rectificati Uncias decem.  
In vase vitreo commixtis paullatim adjice  
Acidi Salis communis Uncias quin-  
que.

Digere per triduum, & ubi utendum  
est, decantha.

#### TINCTURA NERVINA.

R. Olei Caryophyllorum,  
Cinnamomi,  
Lavendulæ,  
Macis, singulorum Scrupulum  
unum

Tincturæ Succini Uncias quatuor.  
Misceantur.

#### TINCTURA PIMPINELLÆ.

R. Radicis Pimpinellæ Uncias duas,  
Spiritus vini rectificati Libram unam.  
Digere per triduum: deinde cola.

Eodem modo paratur TINCTURA  
CASCARILLÆ & MYRRHÆ.

#### TINCTURA SCILLÆ.

R. Scillæ ficcatae concisæ,  
Alkali vegetabilis acetati, singulo-  
rum Unciam unam,



Spiritus vini rectificati Libram semis.  
Digere per triduum, & tincturam decantha.

TINCTURA SUCCINI.

R. Succini flavi pulverati Unciam unam,  
Spiritus ætherei vitriolati Uncias  
quatuor.

In vase optime clauso digere per triduum,  
subinde vas agitando, & per chartam  
cola.

TINCTURA THEBAICA.

R. Opii Uncias duas,  
Spiritus vini rectificati Uncias qua-  
tuor,  
Aquæ Cinnamomi Uncias sedecim.  
Digere per triduum: deinde cola.

TROCHISCI BECCHICI ALBI.

R. Radicis Iridis florentinæ Drachmas  
sex,  
Glycyrrhizæ decorticatæ  
Drachmas tres,  
Amyli Unciam semis,



Sacchari albi Uncias octo.

In pulverem contrita mucilagine Tragacanthæ excipiantur, & fiant trochisci.

Si Croci pulverati Scrupuli duo adduntur, pro lubitu formari possunt BACULI vel TROCHISCI BECCHICI FLAVI.

#### VINUM AMARUM.

R. Corticis Aurantii Drachmas sex,  
Radici Gentianæ rubræ Unciam  
unam,

Piperis nigri Drachmam semis,  
Vini hispanici Libram unam.

Digere per triduum: deinde cola.

#### VINUM ANTIMONIATUM.

R. Vitri Antimonii pulverati Unciam  
unam,

Vini hispanici Libras duas.

Digere per sex dies, subinde vas concutiendo. Vinum deinde decantha & per chartam cola.

#### VINUM CHALYBEATUM.

R. Squamarum ferri purissimarum Unciam unam,



Cinnamomi ceylanici Drachmas tres,  
 Vini rhenani Libram unam.  
 Digere per triduum & tum decantha.

VINUM IPECACUANHAE.

R. Ipecacuanhæ contusæ Drachmas sex,  
 Vini hispanici Libram semis.  
 Macera per triduum: deinde cola.

VINUM SCILLITICUM.

R. Scillæ ficcatae concisæ Unciam unam,  
 Zingiberis Drachmam unam,  
 Vini albi gallici Libras duas.  
 Macera per triduum: deinde cola.

VITRIOLUM ALBUM  
 PURIFICATUM.

R. Vitrioli albi Libram unam,  
 Aquæ fluvialis quantum satis est ad  
 vitriolum diluendum.  
 Cola per chartam & loco frigido repo-  
 ne, ut crytalli fiant, quæ ferventur.

VITRUM ANTIMONII.

R. Antimonii crudi pulverati quantum  
 placet. I 2



In vase fictili lato, non vitreato, ure igne sensim aucto, bacillo terreo diligenter agitando, donec fumum sulphureum non emittat. Hic pulvis indetur crucibulo, ut duas ejusdem tertias partes occupet. Operculo adaptato ignis subministratur, primum modicus, deinde fortior, donec vitri instar liqueatur materia; sollicite cavendo ab illapsu cujuscumque rei inflammabilis. Vitrum liquefactum effundatur supra laminam æneam politam & calentem.

Fusionis peractæ signum est, si massa in crucibulo detenta apice virgæ ferreæ excepta, transparens, levis & æqualis apparet.

### VITRUM ANTIMONII CERATUM.

R. Ceræ flavæ Drachmam unam.

In vase ferreo liquefactæ adjice

Vitri Antimonii in tenuem pulverem triti Unciam unam.

Super exiguum ignem detine per horæ dimidium, spathula continue agitando: dein effunde in chartam, & frigesactum contere in pulverem.



UNGUENTUM BASILICUM.

R. Olei olearum Libram unam,  
 Ceræ flavæ,  
 Refinæ,  
 Sevi ovilli curati,  
 Terebinthinæ communis, singulo-  
 rum Uncias tres.  
 Simul liquefiant & spatula lignea subi-  
 gantur, donec refrixerint.

UNGUENTUM E CALAMINARI  
 LAPIDE.

R. Olei olearum Libras duas,  
 Ceræ flavæ Libram unam.  
 Simul liquatis subigendo admisce  
 Calaminaris lapidis rubri præparati  
 Libram unam,  
 Minii Drachmas sex,  
 Camphoræ Drachmas duas.

UNGUENTUM CITRINUM.

R. Hydrargyri Unciam unam,  
 Acidi Nitri diluti Uncias tres.  
 Digere ut hydrargyrus solvatur. Li-  
 quorem etiamnum calidum adjice



Adipis suillæ curatæ, liquefactæ &  
fere spiffescentis Libræ uni.  
Commixta subigantur in unum.

#### UNGUENTUM MERCURIALE.

R. Adipis suillæ curatæ Uncias duas.  
Liquefiat, & cum ab igne remota spif-  
fescere incipit adjice  
Hydrargyri Uncias duas.  
Commixta diligenter subigantur, donec  
hydrargyrus penitus disparuerit.

#### UNGUENTUM NERVINUM.

R. Sevi ovilli curati Uncias octo.  
Liquefacto & ab igne remoto adjice,  
Olei Laurei Libram unam,  
Terebinthinæ ætherei Unciam  
unam,  
Succini rectificati Unciam se-  
mis.  
Mixta subigantur, ut in unum coeant.

#### UNGUENTUM ROSACEUM.

R. Adipis suillæ recentis curatæ quan-  
tum placet.  
Continue instillando Aquam Rosæ sub-



ige pistillo ligneo, donec adeps nive-  
am habeat albedinem.

## UNGUENTUM SATURNINUM.

R. Ceræ albæ Uncias octo.

Liquefactæ adjice

Olei olearum Libram unam & dimi-  
diam,

Aceti Lithargyri Uncias octo.

Ab igne remota subige bacillo ligneo,  
donec omnium unitas fiat.

## UNGUENTUM E STYRACE.

R. Olei olearum Libram unam & dimi-  
diam,

Resinæ,

Elemi,

Ceræ flavæ, singulorum Uncias se-  
ptem.

Simul liquefactis & colatis adjice

Styracis liquidæ Uncias septem.

Commixta subigantur donec in unum  
coëant.

## UNGUENTUM SUPPURANS.

R. Ceræ flavæ,



Resinæ, singulorum Libram semis.  
Liquefactis adjice  
Cepæ sub cineribus assatæ,  
Mellis suecici, singulorum Libras  
duas cum dimidia,  
Saponis nigri Libram semis.  
Simul incoquantur leniter donec omnis  
humor consumtus sit: tum exprimendo  
cola & subige bacillo ligneo, ut omnium  
unitas fiat.



TABULA